



Nollis neem beleërde Tuks se leisels

Nollis Marais is gister in 'n verrassende wending as die nuwe hoofafrigter van Tuks se Varsitybeker-rugbyspan aangewys.

Marais, wat verlede jaar die trekpas as hoofafrigter van die Bulle gekry het, vervang vir David Manuel, wat gerelegeer word tot hulpaf-rigter van die Universiteit van Pretoria se span.

Marais rig vanjaar Tuks se Young Guns-span (o.20's) af en sal ook die Blou Bulle se o.19-span brei.

Hy sal ondanks dié skuif aanby as die breier van Tuks se o.20-span. Tuks, verlede jaar se Varsitybeker-kampioen, het vanjaar al vyf wedstryde op 'n streep verloor en loop die gevaar om gerelegeer te word na die reeks.

Tuks het in 'n verklaring toegegee dat sy rugbyspan 'n swak seisoen beleef en sê stappe moet gedoen word

om dié situasie reg te stel. Marais se aanstelling is derhalwe deel van die omkeerstrategie.

Marais is verlede jaar tydens die Curriebeker-reeks as hoofafrigter van die Bulle vervang en later herontplooi as breier van die unie se o.19's.

Hy het 'n uitstekende rekord op junior vlak, waar hy die Bulle se o.21-span tot agtereenvolgende nasionale titels gelei het.

Hy het Tuks ook voorheen afgerig en twee keer die Varsitybeker-reeks gewen.

Theuns Reynolds, voorsitter van Tuks Rugby, wou nie gister kommentaar lewer oor die jongste verwikkelinge nie en het navrae na die Blou Bulle Maatskappy (BBM) verwys.

Die BBM het op sy beurt gesê hy volstaan met die verklaring wat Marais se

aanstelling aankondig.

Reynolds het eergister nog sy ongelukkigheid uitgespreek oor die feit dat sy klub nie werklik 'n sê het in die bestuur van Tuks se Varsitybeker-span nie en dat die BBM in dié verband die septer swaai.

Manuel se taak is ook erg bemoeilik deur die feit dat sy span vanjaar sonder Di-van Rossouw, Manie Libbok, André Warner, Embrose Papier, Marco van Staden (almal Bulle toe), Joshua Stander (Stormers toe), Impi Visser (by Bliitsbokke), Chris Massyn en Neethling Fouché (albei Maties) oor die weg moet kom.

Tuks sal poog om sy wenrekening Maandag in Bloemfontein teen nog een van die sukkelaars in die kompetisie, die Sentrale Universiteit vir Tegnologie (Ixias), te open. – **Sportredaksie**



Nollis Marais neem Tuks se leisels.

Foto: GALLO IMAGES